



尋甸府

在省城二百里親領編戶七十六

古滇國地後僕刺蠻居之號仲劄溢源部烏蠻之裔新丁奪而有之至四世孫遂號新丁部語訛為仁地部也蒙氏為尋甸段氏改仁德部元初置仁德萬戶至元中改仁德府領為美歸厚縣國初改尋甸軍民府省二縣入焉成化十二年土酋安氏兄弟爭襲讎殺始奏除流官改尋甸府張志淳城池記略云尋甸外接四川內隣武定霑益諸夷元仁德府基在今城東五里其遷于舊治莫考厥時我洪武中改尋甸軍民府以安氏世襲知府

統之成化丙申革置流官癸卯築土城嘉靖丁亥
安民裔孫銓作亂入之遂制嵩明鏗揚林艱木密
聘馬龍構武定鳳朝文直逼雲南燕西門市舍省
會大震戊子三月徵兵四集始殲之乃築城于舊
治之右踰一澗又置鳳梧千戶所于舊治左之何
見村 木密守禦所城在府東南六十里洪武初
築即木密關也滇載記馬龍州達易龍所號三亭
實八亭途經下板橋關索嶺有戍守 治東丰里
有橋名獨樹雙橋又呼兩座橋治北有迎恩橋安
銓之亂諸生馮世傑携母弟匿橋下為賊所傷母
曰婦人見執賊手不若死傑曰世難不能庇母何
以為人與其弟相率赴橋下死 同時土民有趙
愷必沙皆有能名賊欲得之愷登樓自縊闔門皆
自焚必沙欲謀殺賊賊使人鳩之 勇克山在城

西林壑高深夏月恒有積雪俗呼雪山其泉下注
為党俸溪里許為隱毒山地多嵐瘴惟此開朗土
人每以夏月避暑山中 城北三里廢為美縣地
名溢浦適呂駭甸方百里即仁地之故部也近為
美有怒郎村村有金鞍獅子二山 冷水塘在城
北四里一名矣部烏泉流入沙林甸 僊人洞在

城西南四里內有神僊磴確石床石柱之奇深二十許里其下又有水洞 龍洞在城北五里層巖一石遺龍馬足迹于其上洞口恒集小雀名龍雀木葉落洞水中輒啣去洞泉所經田疇須之注為螳螂河 月狐山在城東北八里環亘五十里又名鳳梧山鳳梧所名本此 三龍並泉在府西十里周圍石如砌就其泉穿山而出面對一洞可容千人地名法果兜 牌額洞在治東三十里有三岔河順流而下近河半里許即洞也深廣約二丈高約丈五尺中有石笋及獸蹄鳥跡之形 阿交合溪在治東十五里有二源一出嵩明州一出馬龍州至治東南五十里合流過霑益州界 跨溪之橋曰通靖四達之衝也長三十丈濶五丈在治東二十里 果馬山在城西六十里泉下為果馬溪其別派流入昆明縣之龍巨江 果馬里有神祠祀大黑天神俗傳像自東川府飛來城東北三里亦有祠 三積山上有九十九泉按與嵩明邵甸交界其水入昆明縣之盤龍江又有鳳凰麒麟山與三稜皆在府峰之亦即里地 怒勒峰有一水畜魚甚多上列六寨曰沙必即曰折瑞曰則干

曰按羊曰怒勒曰納龜皆盜藪與霑益阿汪接界
額吾峰上有清水塘亦有寨曰額吾竹圭東那
沙黑額峰有溫泉二泓齊出溫泉俗呼熱水塘在
城南五十里有溫泉橋長五十丈濶二尺跨阿交
合水上 那多峰有大石寨接東川府界下有三
龍吐水以上三峰各有亂賊潛住在府治乞怒里
界 落耳山洞泉滴瀝不絕巖峰山產石蜜通滇
中之逕路也洗納山有熱水兩塘相對中界一古
樹如傘亭亭峰岡山上有龜塘其水澈碧四時產
龜已上四山在府治可郎馬之界又款庄馬界有

五葦山山下有古洞出泉普按馬界有梁王山接
嵩明州界有海岳山接洗納龍寨 廢陽厚縣在
城西百三十里地名易浪浦籠舊屬仁地部元置
党俸縣後改歸厚其地有溪亦名党俸有九灣九
層城為縣故址其西南有山名落隴雄綿亘五十
餘里東有哇山秀如劍峰土人築寨其上名安樂
城險不可即 滇略云尋甸有野蠻以木皮蔽體
形貌醜惡男少女多一夫有十數妻者持木弓以
禦盜不事農畝入山採草木及動查食之無器四
藉食以蕉葉

臨安府

去省城四百里

領州

四曰建水石屏阿

迷寧領縣四曰通海河西嶠峨蒙自領長

官司八曰納樓茶甸曰教化三部曰王弄

山曰虧容甸曰溪處甸曰思陀甸曰左能

寨曰落恐甸

古甸町國漢之甸町縣也屬牂柯郡蜀漢屬興古郡唐為羈縻牂州地其後蒙詔據之置通海郡段氏為秀山郡後為阿楚部所居元置本部萬戶府尋改臨安諾本朝為府華陽國志甸町縣故甸町王國名也其置自濮王姓母漢時受封迄今

有漢興縣及勝休縣縣有河水從廣百四十里深
數十丈地道記曰水東至母掇入橋水母掇亦漢
縣名 漢書昭帝始元間益州姑繒牒榆反遣水
衡都尉呂辟胡軍正王平大鴻臚田廣明會鉤町
侯毋波大破之以功封波鉤町王成帝時鉤町王
禹與夜郎漏卧二國更相攻擊帝使大中大夫張
匡持節和解之句町夜郎不服刻木作漢使射之
乃遣陳立為牂柯太守出益州斬夜郎王而句町
乃服

建水州附郭

唐為烏麼蠻地古稱步頭亦云巴甸每夏秋間溪
水漲溢如海夷語海為惠歷蒙氏築惠歷城即漢
建水城也元置建水千戶所後改今州 本朝因
之 府治歲月紀云皇明移元日月于強圍叶泮
之交辛之干龍尾伏酉殄顛遏劉臨安平徙治建
水寄釋宮更祝犂大荒落泮三百七十三辰弗遑
立通判許莘大懼弗職諮于司幕議合乃于農隙
建府治于中城基廣三百又六尺期歲紀也修倍
而加八九九陽之數也廳廡垂阿凡為楹若干塗
墜汙填塹而不丹胎民朴也鳩工屬邑齊民力也

役興于暢月甲子遂成以蠲之後甲浹二辰不踰也傭工皆屬吏以能舉也嗚呼春秋謹於防興作歲月筆而不削今大役告成微歲月何以示後通判字師尹大名人籍于杭司幕郭善建水等州同知李凡若干員按府治元時在通海縣五里通海附郭縣也本朝移府治于建水州故以州附郭而以通海隸宣州建水在府城南廣五畝今湮塞過半通志謂之建水池舊有龍宅人環居之府南回回村有龍井每正月朔旦水上輒游雙魚府東門外有玉潔井水味甘冽造楮者資焉

華陽國志興古郡諸葛亮平南中時分建宣牂柯地置屬郡七郡治溫縣志云府治西有溫泉每春暮郡人浴三日乃歸謂之祛疫又府東北三十里香林寺山下亦有溫泉一名香林泉通志曲江有溫泉發自山麓湯沸不可近引別流清冷者為浴池澄澈見底按溫縣名本此府治西有指林寺元人記畧云其地始多林木居人嘗見一鹿指其中率衆逐之不得一異人出指其林中曰鹿處此非一朝夕何可捕也言既不復見咸以為神相與立祠祀之甚靈著元貞間始建殿乃取前異事榜

之以為名 國朝有僧溫成住指林寺得悟一百二十歲乃坐化去沐帥璘詩云邊城公暇興偏賒躍馬來遊釋子家綠映隔窓羅漢竹紅開滿樹佛桑花山光水色如迎客萋葉擯柳當啜茶又得浮生閒半日此身忘却在天涯 東城外接待寺有住持號鐵船戒鵬精專壽八十二坐化作偈曰鐵船渡苦海蝦蟇上樹枝若能悟此理便是出塵時曲江古城在府治北臨曲江一築於漢一築於蒙曲江驛在治東北揚慎夜宿詩云曲江驛裡無燈燭殘月斜明覺夜深梁苑薄遊成滯迹并州客

舍有歸音連營吹角鳴鳴起叩鼓持更統統沈三十從軍今六十何時回隱蜀山峯峯曲江在府東北九十里源出新興由嶠峨經河西入盤江夏秋多水烟樹微茫孤舟往來行者利涉 澶江在府治南源自石屏之黑龍湖東流入阿迷州南為樂蒙州入於盤江盤江去府東北二百里合衆流入廣西府 古盤江縣常璩志云興古有盤町山又曰初爨量保盤南刺史王遜討之不克遜卒刺史尹奉募外夷刺殺量而盤南平乃刈興古雲南之盤江南如南零三縣而立西平郡 段氏古城一

在城南五里澶江鄉今無垢寺址一在城西二里
之蓮花池 寶山距城西南二里相傳山產石如
寶夜有大光故名又里許為樂榮山山泥有香作
餅炙之可食熨婦嗜之以為美 白鶴舖前有白
沙井土人甘之以為第一泉泉傍有羣節墓元末
盜起回回刺魯丁等四十一人栖山谷中誦經盜
脅之不從遂皆遇害身首異處經宿自能合衆異
之為叢莖于此 石山蒙山在府城東十五里山
麓有洞異龍湖澶江諸水流入此洞復流入阿
迷州 巖洞去蒙山五里一名雲津洞山形綿亘
林徑縈紆衆水歸宿伏流會盤江達于南海洞口
空濶可容數百人前阻深潭無徑可通遊者循山
背行達中洞結橋而度列炬而入石髓凝結倒垂
千態萬狀蓋西南第一洞天也鄧溪詩云句町古
樂國淵壘鬱相繆飽聞巖洞佳宿昔神已投紆勒
頽岸側稍折澶水右連蜷步脩坂硯硤陟窮岫篆
形近乃辨正似鳧鍾覆金鋪間綺錢歲蕤著苔厚
旁穿小孔入奮作鼠穴鬪辱豁忽自異所恨非廣
袤信知長房壺別有一宇宙菡萏金芙蓉紛披若
可揉繆虬五色龍躡躑一角獸天人五銖衣宛然

復蹇縞跣跌終不動默如證所授石室稍深入宛
 轉象中葦几榻縱橫列穴處非結搆仙者四五人
 或坐或偃仆丹竈何日封芝田幾人耨哀玉叩冷
 泠百尺噴温溜勺以長生瓢一軟勝芳耐金簡遇
 不識形體如篆籀學道三十年茫然尚難讀中跂
 又以隔淙淙雨聲驟不知潛沫穿翻使衆流湊濤
 石觸其聲鼓吹間一奏頗疑南海潮消息比深透
 萬象洞南明洞俱在岩洞俱在岩洞之後明黃
 町洞壑率幽深突突非列炬不可入茲洞盤旋屈
 折不能二百步而仰開三竇天光晶晶可別鬚眉

蓋他洞所絕無也當口處僅一竅大如甕荒榛野
 蔓翳之今年秋予按郡臨安遊萬象洞天過而疑
 焉命從者從竅旁擊之聲蓬蓬然中若有應之者
 知其洞遂薙而門焉直窮堂與豁矚曠衍可容數
 百人奇形恠狀紛錯空寂令人心駭目炫應接不
 暇昔人謂神仙之所窟宅非歟因名曰南明洞天
 而系以詩云方外遺踪古洞天薜蘿深鎖翠微連
 晴窓窈窕晶光入凍壁離奇滴乳懸白日雲醒龍
 欲起碧枝烟暝雀初旋山林久秘無人識掃石留
 題紀到年判文山在城南五十里高千餘仞中

有三峰削如筆架昔大理段思平外舅爨判居其上因名學士王景常判山翫月歌云判山山上秋月明判山山下秋水清道人持盃待明月氣壓秦華吞滄溟姮娥靚粧倚碧井照見琉璃幾千頃興來吸盡金巨羅舞袖徘徊弄清影景常名奎浙江松陽人國初以懷遠教諭累擢山西叅政謫戍臨安詩文高古人士宗之後召還為翰林侍讀預修實錄有南詔稿志云臨安諸夷居於西南境外者曰幹泥蠻巢居林處治生甚儉家積貝以百二十索為一窖藏地中將死則囑其子曰我平生藏貝若干汝可取幾許餘者勿動我來生用之傍郡者曰烏爨拇鷄獾豺步袁等蠻性悍形陋潛匿山谷惟事剽擄一言不合引刀相割死則以財物償之華陽國志云興古郡多鳩獠濮特有瘴氣自梁水興古西平三郡少穀有枕榔木可作麩以牛酥酪食之人民資以為糧欲取其木先當祠祀梁水郡置在盤江南管二縣曰梁水縣有振山出銅曰賁古縣有采山出銀鉄銅鉛又興古有律高縣縣西為石空山東南盤町山俱出錫故滇略云錫則臨安者佳最上者為芭蕉葉扣之聲如銅

鐵其白如銀作器殊良 郡國志云興古郡有大蛇長數丈尾有兩歧如鈎在水中以尾鈎取岸上人馬食之木有古度不花而實實從皮中出大如安石榴色赤可食實中有如蒲梨者取之為粽數日不煮皆化成虫如蟻有翼穿皮飛出俗謂之無花果揚慎古度賦曰有木詭容在句之東脩梯盤壤巨幹撐空閔華青帝垂實玄工蓐收傳紺屏翳專紅子穿皮出房殊卉叢膚無纖蠹腹育飛虫又曰烜比景灌萇露果星燭葉雲布楠榴相思為黨隣平仲君遷為朋故君子識之是曰古度 南方草木狀云興古有果名劉三月花七月熟其色黃其味酢又有荳蔻樹大如李二月花七八月熟曝乾剝食其核味辛香 荔枝臨安有二樹其一近北山寺大可合抱一在王叅戎別墅僅六寸徑熟以三月形味皆劣於閩廣又有龍眼一株味甘差似嶺南然此三樹之外土人百計種之不育也

石屏州在府西七十里

蠻名舊欣猶漢言林麓也唐烏麼蠻所居築城名末來宋時阿楚蠻奪而據之闢地得石坪聚為邑居因名石坪邑元改邑為州屬臨安訪 本朝改

坪為屏改踞為府屬焉 異龍湖在州東有九曲
週百五十餘里湖中古有三島其中島名小東末
城今呼窀斷山小島名孟獲龍有蛇虫不可居昔
蠻酋流罪人於其中大島名和龍湖立城其上漢
名水城四面皆巨浸東流入于澶江 又州西二
里有大龍小龍二井相去不遠其泉會流入異龍
湖 州北五里有乾陽山高五百丈上有石洞林
木鬱葱山麓有乾陽龍祠所以禱雨又有吳敏德
祠唐時建今徙于州南州南有五塘溝五溫泉注
之以資灌溉灌 州東十五里有萊玉山產佳石如

玉州南二十五里有鍾秀山產紫石可以硯山高
三百餘丈綿亘百餘里其西北有寶山產石如圓
珠 鍾秀山有砌礫石蠻人呼鹿為砌呼石為礫
猶華言鹿石也其高七尺左右各一石高二尺形
如狗逐鹿狀 **明揚宗詩** 怪石三駟得地靈曾聞戍
獵此中經韓盧疾疾飛沙草麋鹿啣啣食野萍蒼
莽埋雲千古秀莓苔着雨四時青發踪指示人何
在一枕眠蕉夢不醒 州西八十里有龍馬蹄石
高四尺圍六尺上有蹄跡傍有四山石為風伯龍
師禱雨響應夏尚忠詩力戰曾勞汗血軀山中風

雨老蘼蕪嶢巖此日留踪在奇骨當年待價沽雲
跂不辭千里遠霜蹄肯受一鞍驅房星落地無今
古疑是周王八駿圖其處有落矣河濶三文源出
元江府西流入黔容甸

阿迷州

在府東南
百二十里

漢以前蠻阿甯者居其地華音訛為阿迷元初立
阿甯萬戶府至元間隸南詔總管府大德間隸臨
安廣西元江宣慰使司 本朝立今州 明鄒應
龍州城門說云東曰儲澤于時為春取春陽布澤
之義直門一溪其流洶湧塘以蓄之俾無涸漫正

南離方故曰陽明以州在南山之阿也西拱秀山
是名峰麗龍潭環湧于外而盤江自西南發源合
南洞冰泉諸水會焉故曰浥抱此予命門意也實
鄙淺無關於政或云儲澤者門對東山諧除賊也
浥抱者北有水下之警諧抑暴也陽明者聲名洋
溢也峰麗者西方于時為秋賦成而民阜其豐利
乎 按東山即烏充山去城東十五里嘗有烏集
其上故名烏充山云西有祿豐山祿豐山之西有
蓬和山三山相連環抱郡治 州東南有買吾山
明巡撫鄒應龍東征至此山忽雷擊逋賊數人乃

易名雷公山其地有通靈洞即南洞也鄒中丞記
略云阿迷郡南有岩穴數處舊為逋藪予輕騎率
帳下士縱獵其場大蒐之山蹊坳密步行且艱至
一洞懸石崖岸詭譎週迴樹根盤拏虬結條上造
霄藤蘿纏挂如蓋下有水湧出分兩派注之溪會
歸盤江焉洞門橫可容三四人予去戎服佩珥俯
俚入列數炬前導初入逼仄下則水石交砌足踏
踈徐捫壁登一石磴力躡之上頗寬敞面懸石柱
數四垂者倚者植立者變態疊出地皆沙石水痕
鱗次氣蒸蒸如鬱再歷十數步一孔豁然透天日

心目爽朗又旋繞之如經數堂中一處更高廣龍
蟠鳳翔鐘鼓懸列紆舒屈曲珠纒乳滴湧滂滂蜿
神鬼怪異真奇境也南厓下黯渺漂沓火燭之則
見橫流汹湧波驚浪躍如決奔馬淵湓瀆瀑皆不
可測志所謂以石投之深而雷鳴者遂由故道出
距岩而立左傍石有標題曰南洞咸謂距此尚有
三洞云 州有揚廣城凡三所一在州東南二里
通安橋前宋時儂智高奔竄狄青使其將揚文廣
追之屯兵於此一城在市坪鋪一城在石頭寨
州之樂蒙河源出石屏異龍湖至建水為瀘江而

西入州廻折而東會盤江下於廣西府按盤江河
在州北二十里源自新興州經建水至此衆流所
會浩瀾澹蕩乃十八寨夷人出沒之限隔也蓋阿
迷與彌勒分界水云杜朝紳詩兩山盤錯陰雲黑
一水中流岸樹青谷口風鳴催蕩槳擢歌夷語襍
烟汀阿迷守禦城在州東百二十里地名虛卜
桶舊有獫狁賊亦鄒中丞蕩平之

寧州

在府東北一領縣二

漢為益州郡之笮都後改沈黎郡晉梁為南寧州
地唐初析置西寧州貞觀中改黎州天寶末沒於

步雄部蠻號其地為浪曠華語為旱龍也後步雄
服於爨蠻乃割浪曠與寧首丘圭於是仍名寧郡
元初置寧部萬戶府後改寧海府至元中改今名
隸臨安既舊領通海嶠峨西沙三縣西沙在州東
寧首世居之其裔孫築城於此名西沙縣後省入
州本朝以通海嶠峨二縣屬焉通志首西沙
所築西沙龍在州之老寨後大箐內首語呼城為
龍也西沙縣故址在州南二里仁善坊內張海詩
云孤城西壁擁層巒繞郭芙蓉秀可餐翠挹烟光
春作雨清分嵐氣曉生寒繪圖有客如摩詰高卧

何人似謝安拄笏鉤簾看不盡酒腸應覺許多寬

浣江在州西南三里水從晴龍潭流下兩岸綠

樹清陰為行客餞別之所 瓜水在州南志謂浣

江之水流自北角思永之水流自西角轉而東南

丁矣冲之水與之俱會於茶部冲形如瓜字故名

按思永河即城南四里海眼泉也 高河在州西

南四里團山頂外窰中窪周二百餘步滂不涸雨

不溢 渴池在海口海眼之中水甚清澈熱如沸

湯每歲秋冬鄉人羣赴浴焉 武石仙迹在城西

十里道傍石凡三其一似人足一似研一似棋局

顛岩泉在州東北十里兩岸相對下有溪澗一

泉自山巔下如瀑布謝溥詩云飛流一瀉落噴

百丈人看挂素紈玉尺休疑量度易金針須信製

縫難林穿濺沫跳珠玉壑漱清音響珮環幾欲臨

流揮彩筆尚餘錦繡出毫端 通志陽暮山即三

龍洞山也三洞俱在山腰上洞崆峒廣敞如大厦

深入莫測內有巧石盤紆如龍如柱如鍾磬鏗然

有聲中洞亦廣濶有石如佛像下洞臨溪湧出多

魚鰕之屬隨水去來山多夕陽倒景作金紫萬狀

碧玉峰在州北十五里岩石磷磷下瞰撫仙湖

波光涵浸如碧玉傍有石如懸鐘又名石鍾巖今
跼居村有碧玉祠鄧漢望撫仙湖詩端居抱遐寄
閉戶生烟雲何況舉開處遙天沂沄沄霜華斂淨
舉日氣澄曉氛木落洲渚出魚龍了可分仙人披
綠髮下來濯清芬瞬予不得說疑是扶桑君自註
湖有峰如仙子狀按志當是孤山山有海瀛寺王
紹宗詩泛棹撫仙湖扶筇海瀛寺烟景似金山鐘
聲到江次登樓山在州東南二十里高可千丈
袤八十餘里遠近之景舉在目中其巔有池方百
步嘗有翠鳥翔集每葉落水而鳥即啣去蒙氏有

國封為東隅之神山形如文字一名文峰又有木
角甸山產薑甘石在州有三十里之備樂村

通海縣在府東北一百五十里

漢時阿楚蠻之居一名阿亦又名尼郎唐蒙氏立
通海郡節度使於此宋段氏所稱秀山郡也元初
為通海千戶隸鄯闡萬戶府至元中改通海縣
本朝因之通志云通海湖在縣北境源自河西
縣來注於此周圍八十里似環而缺俗名海子古
時水渴不通有神僧過此於縣治東北二里石筍
叢立處以錫杖穿一穴水始舒洩通海之名本此

今穴猶存 秀山在縣南六十里一名青山列翠
如屏障下矚長河即海子也山半有判府泉亦因
段氏爨判而名泉味甘冽飲之令人肥皙其麓乃
是秀山泉韓宜可詩突兀峰巒入翠微白雲如練
久相依祇堪仙子裁春服曾與君王補袞衣風裏
卷舒還有態眼前聚散本無機一從醉抱山頭石
未得從龍萬里飛按宜可字伯時會稽人洪武間
以山西布政與括蒼王奎俱謫臨安故其詩多寓
意 秀山頂有湧金寺王景常重修記略云踰滇
以南深淵絕壑惟通海為最勝環通海數十里峻

壑遙峰琅玕琪樹惟秀山為最勝據秀山之奇曰
浮屠者三湧金為勝仰射天光俯臨巨浸城郭居
室之壯盛山林島嶼之蟠虬晨鐘暮鼓隱隱疑在
天上也若其蛇蟺扶輿網緼輻輳出入眇忽四時
昕夕雲霞嵐霧盪摩曳擊與松風蘿月爭為光霽
真諸天兜率之宮豈人間世所恒有哉辭曰雲南
首區星土有截井鉞參旋胎胎凝結神局鬼鑿鬱
為寶林既晦於古聿彰於今相峙鐵牛載朴載斲
暨於月智曰丹曰腹東厓矯矯營山之椒湧金有
陬岌業層霄一時聞望歸於慧庭守道不二觀於

厥成猗歟鏡涵志行貞堅一鉢一錫萬里朝天松
枝南指飛錫聿至賢金泉湧棟宇山委遂殿寶林
遂開湧金遂亭積翠盪軋陽陰云云楊慎詩云鷲
頂金波湧龍宮玉鏡分芳臺淨旭日芳樹翠朝雲
日暇華簪集天空清梵聞空林且花事綠酒映紅
曛 清凉寺亦在秀山元僧鐵牛開山建寺有五
曰湧金曰懸雲曰妙高曰普光而清凉居其一也
每峰巒一疊而寺各一蓋彷彿五臺山而名之

河西縣

在府西北一百八十里

唐於姚州南置西宗州領三縣河西其一也天寶

後沒於蠻為步雄部後阿獃蠻奪而居之名其地
曰休臘元初阿獃部內附即其地立萬戶府休臘
隸之至元中改河西州屬臨安路已改州為縣相
沿至今 縣北琉璃山元時土酋建城砦其上凡
三層 縣西五里螺髻山以峰尖似之尖有丈許
石塔塔前有池中多蓴菜螺獅每晨興雲覆其上
土人立螺峰祠云在螺髻村中 又五里為佛光
山山形中高頂圓左右稍下而秀削如佛光 縣
東有翠微山寺曰慈蔭北有龜山其狀其肖有龜
山神祠 東北磔磔山多石近溪四圍皆水即磔

磧河也通海湖之源出於此水自水磨村流來周圍八十里中產魚族甚繁味皆美其處有碌碑村村中一石如人遠望尤肖呼為石姥有石母廟縣西有川名曰山後川延二百步衰百許步深丈餘四週植柳柳陰中弄影清碧可人 縣東南二十里韃靼營有東湖延四百步衰三百步其北有西湖延百步植隄蓄水所以溉田 縣北有三龍泉以晨汲者見泉中一物如蛇而三頭故名縣西南十里有九龍泉延百步昔有密僧善降龍龍有九頭立廟以雩之又縣北百里有龍馬寨相傳古有龍馬現此

嶧嶧縣

在府西北二百六十里

漢為益州郡地晉屬南宣州唐時為嶧獬蠻所居號嶧義部後為阿楚蠻逐而據之元初內附立嶧嶧千戶所至元十三年改為州領筇川平甸二縣其後州降為縣以二縣為鄉屬臨安詔 本朝因之 筇川鄉在縣西北九十里山麓有洞泉自石門中流出平甸鄉在縣西一百七十里又五十里興衣鄉有邃巖深邃廣濶直巡檢司前 唐嶧獬寨在縣西北四十里元時建基址尚存又云古縣

治在縣東北二里嵒峨山之陽也 縣南有南寺

亦名如是菴 明周登南寺鐘聲詩 梵王樓閣遠塵

焚一枕蒲牢曙色分東谷響傳西谷應上方聲徹

下方聞翻經臺落淒淒月洗鉢池封淡淡雲回首

桂峰村舍近隔林驚起幾雅羣 桂峰山在縣南

二里高峰峭拔上多桂樹故名下有橋橋頭有祠

竝依山谷與桂山相連為龍山山下龍泉四時不

竭一云即溫泉也 縣西南九十里怕念鄉有五

鳳山五山連峙其勢如飛山麓有洞深廣可容數

十人名鳳山洞 近縣之山有若屏風者有若旗

鼓帽合者各以形似得名 縣西十五里三元洞

兩山竝峙東西二門高十餘丈中可容一二百人

洞三層上層光明透徹中層光不及之但有奇石

異狀下層如平田坳坎中一水穿過沁爽宜人

合流江在縣東南一里兩水異源一自新化州流

至當縣北為大河一自石屏州流至當縣南為小

河會流至於府治之曲江 丁癸江在縣西北二

百五十里源自三泊縣流來其水洶湧空濶居民

剡木為舟乃可渡

蒙自縣 在府東一百五十里

地接建水有唐時百夷所築故城南詔以趙姓者
守其地宋為阿𦏧所有元初歸附置蒙自千戶所
後改為今縣 境內有山名目則漢語呼為蒙自
縣所由名也在在縣西三十里橫列二十餘峰多
巉巖怪石明何應春詩萬疊峰巒孕紫烟重來生
意滿陂田清風泉自龍湫發落日人從鳥道旋遠
浦新晴飛白鷺疎林殘暑咽寒蟬夷民村落常更
置幾處荒基蔓草芊 雲龍山在縣東三十里王
景章記云喻蒙自三十里而遙四山蟠束如湊若
蒼虬行天百靈景從蜿蜒飛舞可愕可愛前出數

里林木蒼鬱拔起如画路人指是名石室中可坐
千人又前數十里石巖嵌上而削下有峰蔽日營
戶其陽土人利之周旁有石洞一罅啓牖上平經
行者夜宿其中足容百人無虎豹蛇虺之患其前
危峰十數萃崒嶭雲表隱若城壁風松語天半可望
不可即一迳逶迤側入其中皆山箐廣數十弓袤
數里兩峰石筍如束草木連卷雲氣出如白練奇
形詭勢鬼鑿神工不相連屬如覆盂如巨牖如虎
噬如龍翔如玉女靚粧勇夫卓旗千變萬狀不可
殫述遙睇其中迴峰盤固翠雲相盪琅玕琪樹瑤

草文鹿出渺入忽意者必有安期羨門往來其間
非人世也不然則山精木客之窟宅殆神物為之
啓閉世有謝靈運刊木通道奇秘當不在十洞天
下日昃絕壑火光青營疑為鬼燐策馬疾馳宿小
雲龍山下萬石林峙雕玉鏤雪白光摩夾甚怪土
人鑿石為峽騎行通南即大雲龍也從絕頂烏道
絕雲霧間蹉躑數里不敢俯眺一峰東轉屹若屏
幃可數十仞峭峻尤甚耳羅山在縣東北三十
里每有風雨雷電自山峰中起年必大豐以為驗
鸚鵡山有二處一在縣西五十里一在縣北七

十里其地多出鸚鵡故名羨哀山在縣東九十
里其上石筍森立絕頂平廣千頃有三池縣西
南之水曰西溪溪凡二所一出銀礦一出錫礦
縣南百步有草湖濶長十丈東南有梨花江其源
發元江府經納茶甸至當縣東南入交趾清水江
長橋海在縣東二十里構木為梁長十餘丈四
面皆水又二十里為矣波海中多魚蝦海菜仙
人洞在縣東七十里寬二丈餘四面石壁懸注如
鐘鼓滇略云蒙自山中有仙草葉圓枝細採其
葉乾之一二年薰以泉井或氣呵之復鮮茂如故

此亦太和山萬年松之屬也

納樓茶甸長官司在府西南一百八十里

蒙詔之茶甸地元初置茶甸千戶所隸阿寧萬戶

府至元中改隸善闡宣慰司後分為二千戶隸雲

南行省尋改隸臨安宣慰司又改今名 本朝改

長官司隸本府 松山在司南一里松子產焉

曲通山在司西南八里山下有泉兩派一流入豐

祿縣一流入石洞即仙人洞也在司東北五十里

流泉湧溢樵者經之恒聞洞中有聲如別鷄天

羚羊洞在司北中產礦煉銀其高聳處有羚羊飛

石層積人不可到 風洞在司東二十里風從洞

出四時皆然 魚洞在司東南六十里每春月輒

有魚蝦遊泳蝦色紅肥澤長可五寸呼為仙蝦

納樓有三渡司南四十里祿蓮渡東南百里乍甸

渡司東百五十里呵土渡也 滇略曰臨安所屬

長官司曰納樓教化王弄虧容鬼陀溪處落恐左

能安南凡九納土官普姓

教化三部長官司在府東南三百五十里

唐時強現蠻居之謂強現身車等三部酋也華語

訛為教化元名強現三部隸臨安宣慰司後屬強

現四部 波岁山在司西四十里孤峰秀削出羣
山之上 魯部河在司西南三十里源出禮社江
經司境流入蒙自之梨花江

王弄山長官司 在府東南二

元兀良吉歹之征交趾也踞經阿迷於是立王弄
大小二部

虧容甸長官司 在府西南一

漢時為鍊容甸部元至元中內附撥隸元江路其
地上熱下濕多瘴癘常以安置罪人 本朝改今
額 虧容江在司西五里即元江府之禮社江也

流至本司東經車人寨出宣遠州李壁詩虧容江
上是天涯斷髮文身幾許家四月山風扇矣燠檳
榔樹樹盡開花盖司西北五十里有檳榔渡云又
有茶渡在司北四十里

溪處甸長官司 在府西南一

漢為七溪之溪處甸部其酋名賀殫華訛為和泥
初本一部至酋官桂兄弟分為三部溪處甸其一
也元置軍民萬戶隸雲南行省後羅繁萬戶府屬
元江路 本朝改今屬 司西之山奇峭延長民
居山上其中有溪澗即溪處山也

思陀甸長官司在府西南五十里

舊為官桂思陀部初管落恐溪處二部後不相服乃分為三元置和泥跖隸雲南行省後屬元江跖本朝改今屬 司東山頂平夷處有思陀寨址亦曰思陀山

左能寨長官司在府西南二百三十里

舊為思陀甸寨後不相服乃改為左能寨 本朝改今屬

落恐甸長官司在府西南二百里

唐時名伴溪落恐部屬思陀甸後不相服元置落恐軍民萬戶隸雲南行省後屬元江跖 本朝改今屬

安南長官司在府東南一百九十里

本阿焚蠻所居舊名廢古後名捨資元捨資千戶所後以地近交趾改安南道防送軍千戶屬臨安路 本朝改今屬 土產金紫檳榔鱗蛇膽蛇長丈餘四足有黃鱗黑鱗能吞鹿春冬在山夏秋在水土人殺而食之取其膽可治牙疼解毒藥黃鱗為上黑鱗次之又云臨安近接交趾稱雲南極邊也 按臨安所屬長官司若納樓茶甸獨居江內

若虧容溪處思陀落恐左能五甸寨則居河外其西偏也若教化三部王弄山其南偏也其密邇外國若車里若八百媳婦若交趾所謂邊徼重地也長官司皆 國初改置安南近議裁省

澂江府

百在省城西一

領縣三曰河陽江川陽

宗州二曰新興跖南

漢置俞元縣於此唐天寶末沒於蠻號羅伽甸後為楚蠻所奪宋段氏析蠻為三部曰強宗曰休制曰步雄後步雄部有居羅伽甸者號羅伽部元初內附置羅伽萬戶府至元中升為澂江路 國初改府

河陽縣

附郭

南詔於此置河陽郡元降為縣 本朝因之 常璩志云晉河陽郡刺史王遜分雲南郡置屬縣四

戶千河陽縣在郡治踞河中源洲上 府治舊在

金蓮山前弘治中遷於山半正德中遷陽溇山麓

嘉靖中復遷金蓮山隆慶中與城同遷於舜鳳焉

舜鳳山勢自羅藏山之中支逶迤而來如鳳首

覽輝而下左右兩山竝峙若展翼焉 金蓮在縣

治東高圓平正衆山環拱日光照耀有若金蓮暘

溇在府東五里上有蜀漢諸葛營乃建興中丞相

亮選拔酋長駐兵之所 東街曰漱玉莊鏡二橋

漱玉泉出重珠山下莊鏡泉出碌碡山下附郭田

疇資其灌溉 西街有立馬閘以防龍清廟之水

有太平閘以防梁王衝之水太平橋在治西二里

跨羅藏溪 西古城在縣治西元時築遺址猶存

城西十里別有西街城民居稠密正德中寇警知

府唐臣諭衆各以其屋地所占及第戶之高下分

築為城周匝三里為五門 撫仙湖在城南十里

一名羅伽湖一名清魚戲月湖周三百餘里北納

諸溪流南受星雲湖涵泓清澈一碧萬頃其中多

石玉筍山撫其上宛如仙子憑鏡而立湖中有蜺

蜺魚可以辟瘴尾閭東會鏡池盤江達于南海按
玉筍山舊名湧拔山在縣西南二十里孤高獨秀

有玉筍之形楊慎詩云激江色似碧醍醐萬頃烟
波際綠蕪只少樓臺相掩映天然圖畫勝西湖
羅藏山在府北十里東漢志云裝山出銅後訛為
藏又蠻語虎柵為羅藏昔有虎自碧鷄渡滇池為
民害土人造柵取之山高五千尺其上平衍有龍
湫時興雲霧元梁王於此立寨又名梁王山南有
泉流為羅藏溪入撫仙湖北有泉流為錦溪西有
泉流為彌勒石溪俱經陽宗縣入于明湖山之
東有菜花坪野菜蔓生可為蔞相傳梁王宴遊之
處耕者往往得其遺物闕摩山在城東多巖穴
泉竇其水流為北波沿有北波龍廟在山下以三
月上巳致祭山有華藏寺元丞相楚刺流寓至此
樂其幽蔚栖焉足迹不入城市者累年卒莖山之
半其詩云洪鐘清遠透禪關華藏招提烟霧間浮
世已更新態度青山不改舊容顏洞中水湧潛龍
臥松頂風生野鶴還久已不牽名利鎖洗心來伴
老僧閒華藏寺石壁間有岩如鷄曰金鷄岩相
傳金鷄啼未價貴人以為怪擊去其首喙鄧漢華
藏寺詩梁州仲冬月氣候如秋蚤憂俗省煩瞽乘
閒恣幽討鳴笳越修阪停車度清潦攀林踐香界

漸近山更好，斲翠開筠房。疏碧架蘭橈，銀榜倚虛
壁。紅亭映深島，溫泉珠自瀉。雜英霰微冒，迴颺蕩
松林。蒼翠若可掃，山果摘霜橘。蔬食甘蒹藻，蜀俗
鮮勝韻。遺策得曠抱，去住久已審。懸車豈待老，
治西北有龍。爬山其山有龍，爪爬搔之迹。東南有
迴龍山，又名象鼻嶺。石骨低迴，蜿蜒如入湖狀。其
脊分壠，旋轉北望羅藏城郭。左顧若龍蟠然，蟠
龍岡石岩雙湫夾出，曰西巒一云，即西浦龍泉也。
舊傳水自地中接昆明池，雙湧於西山之麓，流不
百武，南折于海。今為閘堰之蓄洩，以時有西浦龍
神廟在蟠龍岡，歲以春三月上辰致祭。白古記
云：澱江有波羅傍者，佐蒙氏細農羅衣錦袍，執儒
書教之，以文而厭羅刹之暴，伏龍鬼之嗔。蓋阿叱
力者流也。蜀志：李恢字德昂，建寧郡俞元人，為
郡督郵，坐姑夫建伶令爨習有罪，免官。太守董和
以習方土大姓，寢不許，後貢恢於州。恢知州牧劉
璋必敗，自結先主為功曹書佐，主簿，遷別駕從事。
進康降，都督使持節領交州刺史，住平縣。丞相亮
南征也，先由越雋，使恢案道向建寧。諸大姓相糾
合，圍恢軍。昆明衆少敵倍，又未得亮聲息，乃以計

詔南人得緩圍而大破之追奔逐北南至盤江東
接牂柯與亮聲勢相連南土平定封漢興亭侯加
安漢將軍建興七年以交州屬吳解刺史更領建
寧太守還居本郡徙漢中九年卒子遺嗣 其俗
之異者以啜酒扁耒為禮男女同市近郡之糶糶
性雖頑狠然敬其長上土官至爭迎迎到家刲羊擊
豕罄所有以供之婦女皆出羅拜務取其歡心

江川縣

在府東南九十里

漢時名碌雲異城又名易籠城唐蒙氏徙曲旺蠻
居此以白蠻守治之段氏以步磨徙蠻子孫分管

其地名步雄部元初置千戶所至元中改江川州
尋降為縣縣治有石其形如龍即碌雲異城也

縣南星雲湖周圍八十餘里東流五里入于撫仙
湖楊慎詩通海江川湖水清與君連日鏡中行孤

山一點衝烟小何羨霞標建赤城 縣有三河上
河發源於阿化冲分流於前廣三衛中河與上同

源流抵烏鴉村下河即中河之分也流抵左衛營
海門橋在城東南八里臨安要路也星雲湖水

經其下由此登舟而泛撫仙 海西村有兩井皆
出溫泉西山下有冷水泉俱下注星雲湖 龍鳳

山在縣西三里崇岡疊阜為縣鎮山冷泉溫泉同源于此 志云自嘉至隆庚午十年之間五色光再見于龍鳳山山有雲集寺唐名龍鳳沐西平易今名董難詩云石竇白雲間丹崖手可攀雨吹臨瀑布溪轉學螺鬟妙響聞靈籟浮生覺夢闕禪栖蘿月下清露洗秋山 東山寺距城三里山頂浮圖唐天寶二年建今呼天寶塔 蟠坤山在縣南十五里東臨撫仙西際星雲山頂石皆赭童無草木有蟠坤神廟在石岩中廢久忽一日廟址上有馬跡大如碗見者平之次日而跡愈多於是土人復其祀 屈穎顛山在縣北十里^五里山半湧泉三派西入滇海東入撫仙南為阿件乃入星雲湖土人謂屈為天顛為惜顛為功嘗有獵是山終日不獲者歸咎於天故名 綠籠山在縣西北十五里

林木蒼翠下有泉為六部溪東流入星雲湖 部椿城在縣北二十里昔蠻易昌所築元置雙龍縣於此今廢為雙龍鄉 滇略云雙龍鄉有覆盆山其山無石皆螺殼積成昔有夷婦澣衣于河忽螺精出見婦驚急以澣衣盆覆之其精遂止後人因以名山 鄉中有古樹不知其名初春茁葉自南

則旱自北則雨自東自西則風雨時禾稼登四圍
 竝發則饑饉旱澇驗之無爽 丁連然君墓在縣
 北三十里山麓先時覆以巨石有耕者憇之石忽
 動驚異斲石得碣面勒丁連然君之神道按史宋
 太宗時有交趾王丁連然來朝疑即其人且古之
 交趾亦今之郡地也

陽宗縣

在府北四十里

唐時麼步蠻居此號強宗因以名部後訛為陽宗
 部元初蠻酋盧舍內附置陽宗千戶所至元中改
 為縣屬澂江路 本朝屬府 夾浦山在縣城西

彌勒石溪及冷水塘二水夾之 梁王屯在城東

南二里碁坪山上有廢垣元梁王曾城其上 黑

相城在縣東一名輸納龍城 明湖在縣北一名

夷休湖一名陽宗湖源出羅藏山下流入盤江週

七十餘里兩崖陟絕山水赤色魚味甚嘉 彌勒

石溪亦發源羅藏山流經縣治東北而入明湖

日角溪在縣西北八里發源覺卜山下伏流過路

南之天生橋復出為茲溪也 縣西十里有濯纓

泉縣南三里有青龍泉二水清冽上有龍祠歲季

春官民祀之以祈水 縣西北七里之化石祖山

其南有泉洄汭為溪北入明湖 天馬山在炒甸南三十里山形肖馬故名兩山竝護峰巒起伏茂林曲澗蒼鬱盤旋陟其巔東見宜良大池江南望澱江撫仙湖西連陽宗梁王屯北觀湯池萬福寺山麓流泉環繞若帶邑人趙世麟墓父於此獲九狼二兔之異

新興州

在府西一百二十里

漢青蛉弄棟二縣地梁為土人爨瓚所據分為西爨地唐貞觀中置求州屬戎州都督府天寶末沒於蠻蒙氏置溫富縣段氏徙麼些蠻居此元置部傍普舍二千戶所至元中改部傍千戶為休納縣又於休納置新興州領普舍研和二縣後省休納入州屬澱江路 皇明併省研和普舍入焉 白城在州北昔大理段氏之世強宗部蠻之裔長曰部傍據普舍籠城即休納城也次曰普舍據普札籠城城在州北二十五里二城之間有白城乃漢人所築二苗累爭之不能定 州西有祿匡城南有昌人城故研和縣有玉乞城皆漢築者畔龍城在州西十里元置縣後省入研和有研和城在州南三十里昔麼些蠻步雄居此 奇梨山在州治

西林木茂蔚下有泉流入大溪溪源東北出金鷄山流繞西南合羅麼奇梨二溪過崑峨縣而入曲江 羅麼山在州東北二十里今名石厓山其下有白龍溪凡九曲 靈照山在州東十里有靈照寺大碁山在州西北十五里上有石枰相傳有仙奕棋于此又五里為九龍池池聚九泉分灌赤壤又五十里為蒙習山一名適饑山山頂與晉寧州分界

路南州在府東一百三十里

元憲宗時置落蒙萬戶府至元中改路南州領邑

市一縣州東半里有撒呂城即舊州城也 國朝

弘治四年省邑市縣入焉 照鏡山在州西北二

里山前有池如鏡倒影其中 休柔山在東北十

五里今名九盤下有流泉曰休柔溪南流入盤江

羊鼻山在州東十五里以形似而名頂上有泉

土人引之灌溉 木龍山在州東南十五里高五

百餘仞其處有遮日山峰巒峻拔陽輝被掩故名

關索嶺在州北三十里稱峻險之地 劄龍山

在州東八十里山下小石可煉為銅 鐵赤河在

州西源自陸涼州經邑市過瓦渡雙龍溪至州境

西南又過興寧溪下流入盤江 巴盤江亦源陸涼州經邑市宜良入廣西府界 天生橋二所石梁可渡不假人力一去州五十里一在東北十二里 州南有彌沙城漢時築元初置彌沙縣於此後省入邑市縣邑市故城在州東八十里 州東三十里有韃子城夷語為底伯靈其城起自曲靖抵于廣西綿延三百里昔蠻酋弟兄築此分界

廣西府

距省城四百里

領州三曰師宗曰彌勒曰維

摩

漢益州牂柯郡地隋屬牂州後為東憲烏蠻彌鹿等部居之唐隸黔州都督府後師宗彌勒二部寢盛蒙段皆莫能制元憲宗七年始內附至元十二年籍二部為軍置廣西路 皇明改為今府舊土知府昂姓今為土照磨 築城記略云廣西水臨水下沙夷西近龜山巢寇南連路南州北接陸涼舊越州土舍夷獮四面雜處而沙夷尤稱獷悍舊為矣邦生納下村土官掌之 國朝成化間更置

流官賀勛來知府事始築土城焉 城中山曰鍾
秀城北山曰發果俱峭拔與崕嶺相接環于府治
與治相應之山曰翠屏其形如屏障然 城西三
里為阿靈山山下舊為阿靈部延亘四十餘里南
連彌勒北跨師宗 阿靈山洞深邃莫窮中有雕
欄寶塔鐘鼓石床佛龕之異郡人多遊焉洞中流
泉入于西溪蓋師宗諸水多伏流於地至此始出
為溪流經府城西環抱城南與東溪合 阿靈山
中石竅出水一支流入矣邦池池一名龍甸海週
三十餘里半跨彌勒之界而彌勒吉雙鄉之水皆
注焉 矣邦池中有小山山上有福廣寺池水南
入于盤江盤江自宜良縣流經府境而入于羅雄
州蓋郡中諸水惟此為大 巴盤江一名半江自
潯江東南來流經本府之西過彌勒而東注于晉
安州界 志曰諸山為屏八甸為塹彈壓烏沙土
獠諸蠻是廣西之大勢也郡有黑爨焚夷土獠沙
蠻獠獠五種雜居土獠得犬方祭婦人以黑線綉
布裹頭纏腰獠婦以布為袍員領大袖前及膝
後曳地有爭辨者詣鬼神言誓直者敢去曲者退
縮尚有古風黑獠獠自恃其貴而強好爭鬪事剽

掠其間惟有白人好書差強人意耳

師宗州在府北八十里

宋時爨蠻逐獠獫等而居之其後有師宗者據匿弄甸號師宗部元初隸落蒙萬戶府至元中以本部為千戶把總領阿寧豆勿阿盧豆吳四千戶屬廣西既後改置今州 州北五里三峰峭者為恩容山又十七里雙峰聳立者曰鎮北門山言經行其門如門扇也 州東南二十里有檳榔洞村村中有元時總管府治址今廢 州東八十里有英武山高可千仞 洪武初設有英武驛于其下山

饒盜賊與虎虎嘗啣英武驛丞以去自後少人行

驛遂廢 鄧漢英武關望姚安諸山雪詩 英武關頭

蚤行客北風林葉飄蕭撼高原夜雨生晚寒金秀

諸峰雪盈尺九疊橫舒雲母屏千里照耀銀沙磧

憶從北土賦南征歲月常歌苦熱行圍爐集句思

兒女買棹臨流憶友生憑軒忽覽瑤華色腸斷芳

裊角枕情 又三十里有祿德山孤峰秀削一作

六德山有六德廢驛址在山下其地名阿歹村多

禦人 又三十里有馬者籠山高峻挿天弘治十

年本州阿定鄉去此二十餘里有一山高可五丈

根蟠二十餘丈一夕移於馬者籠山邊有三大樹
隨山而徙皆不搖動土人但聞風雷震撼之聲旦
起視舊處已為平地

彌勒州九在府西

宋時步麼徒之裔名彌勒者得郭甸巴甸部籠而
居故名其部曰彌勒元至元中改置今州 州治
舊名八甸村弘治十一年始城之有八甸溪在治
北其源三一出本村一出阿欲山一出北傾山至
州治東而合流南入盤江 治前玉津橋即跨八
甸溪之上橋長五丈濶七尺 巴甸江源出本州
西北南流數里注于盤江或云即八甸也州境又
有山湖產大魚 卜龍山在州南五里即步龍部
千戶山環遶州治疊嶂重巒蒼鬱可觀 阿欲山
在州西十里即阿欲部千戶亘七十餘里下有温
泉濶二丈許深三尺餘水色瑩徹可以浴其東接
北傾山在州北三十里阿欲鄉中高可五十餘仞
西連阿欲構甸二山 元四千戶中有吉輸部吉
輸山在府東南五里惟哀惡部未詳 盤江山在
州東南百里東西兩山相峙盤水流其中東抵師
宗州南界阿迷州其中有石竅深廣丈餘濁水湧

出注于江

維摩州

在府東南三百六十里

元立維摩千戶隸阿迷萬戶至元以後改為今州
 皇明因之舊土州同資姓今李姓 曲部山在州
 西中峰高聳下有泉為溪流經州南數里入石竅
 伏流城中曲部驛名本此 小維摩山在州東北
 八十里高可千仞 阿母山在州東南九十里高
 亦千仞山下有阿母驛阿母驛東七十里為維摩
 驛 州東北百里有萬年龍山山下有泉為溪流
 入廣南府界有寶寧山下亦有泉為寶寧溪 州
 東南百里則大維摩山也州名因之高出眾出之
 上土官世居于此今革去為流 折角山在州東
 南百五十里下有泉為折角溪 龍定山在州東
 南三百餘里五峰屹立遠即望見之

廣南府古五城八領州一曰富州親領編戶

六里

宋時名特磨道儂智高之裔居之元至元間立廣南西路宣撫司領路城等五州後來安路奪其路城上林羅左三州惟領安寧及富而已 皇明洪武十六年歸附改今府土同知儂姓 志云廣南古無郡邑西洋江限其南牌頭山為之鎮崇厓巨壑峻阪深林之區也按牌頭山在府西北五里層巒起伏其右小山連峙如盾土人築砦居之 蓮花山在城東北二十五里五峰連聳諸小山參差

傍峙狀若芙蓉 西洋江去府城八十里源出本
府板郎山及速部木王山三流合湊東南入于田
州府之右江 元咸陽王廟碑云至元十三年冬
遣使檄廣南雞洞時儂士貴及左江李惟屏右江
岑從成等二十人各獻土物納款勒碑識之云
本朝靖遠伯王驥傳云正統初廣南土官通判儂
舉與富州土官知州沈政舉兵相仇殺者十餘年
驥設法慰諭之不煩一兵而兩仇頓釋盖平麓川
之餘威也 小孟貢江產鮪魚食之日銜百女故
夷性極淫無論貴賤有數妻不相妬忌山產鬱薑

餌刀圭終世絕人道土人以飼牡馬又產蚺蛇欲
取者先以雞骨卜吉則入山麓求之蛇見人輒伏
不動夷語之曰中國天子求爾膽可伏死否則亦
不汝貫是不昭汝靈也蛇反背就戮今言去膽猶
活謬耳膽有三等生頷下者以傳毒矢居腹者入
藥治病疽者以童便研一合服之又以傳患處立
愈居尾者不堪用棄之又蘇合香膽礬腦子阿魏
騏驎竭諸竒藥皆產焉獨無麝麝價與金相衡地
多虎土人狎象而畏虎農人守禾皆宵宿樹杪結
草樓以捍風雨衣皆套項統裙鵝毛為裯褥温毳

逾于木綿其境東及金沙江西為吐蕃南緬北撾
方數千里

富州 在府東二
百六十里

沿革見府 國初以安寧州省入土知州沈姓

袿丕山在治西形如狻猊昔土人結屋避兵其上

今呼獅頭寨 玉泉山在州西北七十里絕頂飛

瀑如練下有石池洄旋清碧溢流于西洋江 蒼

鷄山在州東南九十里高可二百仞恠石嵯岬夷

首之壑穴也 西寧山在州東北百五十里下有

巖洞深邃蠻人潛避其中不可究詰 楠木溪在

州東二十里源出花架山其水常暖 南汪溪在

州西麻卯山及僻冷山流至州南會楠木溪東行

至石洞泱流十五里復出入于右江

鎮沅府

去省城一百二十里

領長官司一曰祿谷寨親

領編戶五里

古濮洛雜蠻所居元史謂是和泥昔樸二蠻也唐時南詔蒙氏銀生府之地其後金齒爨夷據之元初內附以為威遠州復置案板寨屬元江詔本朝洪武初陞今府土知府刀姓案板山在治東北高百餘仞形如几案舊寨以此得名波弄山在府城西山勢起伏如波浪疊來山之上下有鹽井六所土人掘地為坑深三尺許納薪其中焚之俟成灰取井中之酒澆灰上明日皆化為鹽鹽色


黑白相雜而味頗苦俗呼白鷄糞鹽用以交易
治東北有烏連山常集百鳥故名 杉木江源出
者樂甸流經府治南下流入威遠州界江岸多杉

祿谷寨長官司在府東北二十五里

皇朝永樂十年置 司北八十里馬容山高千餘
丈延亘數百里石路隘狹僅容車騎曰馬容者猶
言容馬也 司南百里為石羅山司東百里為小

不舊山又西二百里為納羅山山多虎豹土人呼
虎為羅呼藏為納 馬湧江源出納樓甸經寨東
下流合于南浪江 南浪之源出納羅山經寨南

下流入寧遠州界 郡產孔雀及小雞雞形矮小
鳴經晝夜與中國雞聲異民居依山為郡藉水叢
居婦人勤蠶織務耕作而略無少暇產子先浴之
江而歸付其夫



律